

## El la estraro de Germana Esperanto-Asocio

### Malnova estraro restis, bonvenon al Felix Zesch

Dum la membrokunveno en Münster oni reelektis la malnovan estraron komplete. Por la prezidanto Rudolf Fischer komenciĝis la lastaj du jaroj de sia ofico, ĉar la statuto permesas maksimume dufojan (sinsekvan) reelekton. Dum posta kunveno la estraro reelektis Andreas Emmerich vicprezidanto. Nova en la estraro estas Felix Zesch (samtempe prezidanto de Esperanto-Ligo Berlin kaj de la landa ligo Berlin-Brandenburgio). Li faros Eŭropan laboron, t.e. ke li kunordigas la Eŭropan aktivadon kun la Eŭropa Komisiono, kiun estras Winfried von Wallis. Krome sinjoro Zesch provos helpi al lokaj aktivuloj, organizi Esperanto-kursojn.

### Grava reorganizo de financa subteno de lokaj grupoj

Laŭ decido de la membrokunveno ekde 2012 la financa subteno de lokaj grupoj okazos ne plu laŭ individuaj kontraktoj, sed laŭ simplaj formalaj

kriterioj. Por esti agnoskita kiel loka grupo de GEA la grupo devas havi minimume 5 ordinarajn GEA-membrojn plus 5 ne-ordinarajn. Ĉiu persono rajtas nur esti en unu grupo (laŭ vidpunkto de GEA). Grupo aktivas en certa geografia areo, ekzemple urbo aŭ parto de regiono, kie ne ekzistas alia grupo. Izolaj membroj ekster tiu areo restu esceptoj. Lokaj grupoj povas ricevi subvenciojn. Se grupo estas agnoskita kiel komun-utala, ĝi ricevas fiksan sumon (10 € por ĉiu ordinara membro) komence de la jaro. Krome oni povas peti subvenciojn por konkretaj agadoj (antaŭ ties okazo), tio validas ankaŭ por grupoj, kiuj ne ricevis la agnoskon de komun-utileco.

Detalojn vidu sub [www.esperanto.de/gea](http://www.esperanto.de/gea) => Förderrichtlinien für Mitgliedsvereinigungen

### Sunmontaj Gvidlinioj por Eŭropa lingvopolitiko

La membrokunveno en Münster postulis unu ŝanĝon de la GEA-estrara propono. En alineo 2 (Esperanto en la Eŭropa Unio) la antaŭe lasta

punkto estas nun la nova 2a kaj tekstas German-lingve:

„Wir sehen zur Zeit keine unmittelbare rechtliche Möglichkeit, Esperanto zu einer der Amtssprachen der EU zu machen.“

Sube venas la kompleta Esperant-lingva versio.

Vidu ankaŭ: <http://www.esperanto.de/deb/leitsaetze.html> resp. <http://www.esperanto.de/gea/gvidlinioj.html>

### Kunveno de la konsilantaro kaj de la estraro

Kiel intertempe tradicie, kaj la konsilantaro, kaj la GEA-estraro kunvenos aŭtune en Herzberg, ĉi-jare de la 28a ĝis la 30a de oktobro.

Rudolf Fischer

## Sunmontaj gvidlinioj por Eŭropa lingvopolitiko

### Ĝenerala lingvopolitiko

1. Ni subtenas la multlingvecon.
2. Ni alcelas edukon, precipe de infanoj kaj junuloj, al respekto de ĉiuj lingvoj.
3. Ni subtenas iniciatojn por interkultura komunikado en Eŭropa kadro.
4. Ni estas por lingvopolitiko, kiu ne kondukas al flankenŝovo de lingvoj.
5. Ni kontraŭas lingvan diskriminacion.
6. Ni instigas al EU-vasta interŝtata dialogo pri lingvopolitiko.
7. Ni atentigas pri la konflikto inter la rekomendoj de EU rilate lingvojn kaj ties realigado en la membroŝtatoj.

### Esperanto en la Eŭropa Unio

1. Ni atendas racie pravigitan sintenon pri Esperanto, precipe ankaŭ de fakuloj kaj politikistoj.



Foto: Martin Sawitzki

Membroj de la Loka Kongresa Komitato preparas kongresmaterialon antaŭ la kongreso en Münster. De maldekstre: Olaf Schreiber, Christian Kowalski, Guido Brandenburg.

2. Nuntempe ni ne vidas senperan juran eblon, igi Esperanton unu el la oficialaj lingvoj de EU.
3. Ni kredas, ke Esperanto povas subteni la ekiĝon de Eŭropa identeco.
4. Ni subtenas la ideon, kanti la Eŭropan himnon en Esperanto.
5. La elprovo de Esperanto kiel laborlingvo en certaj organoj kaj instancoj de EU estas dezirinda.
6. La uzo de Esperanto kiel relaxsa lingvo en la Eŭropa Parlamento havus avantaĝojn.

### Esperanto-instruado

1. Ni rekomendas Esperanton kiel propedeŭtikan instrumenton por subteni la lernadon de fremdaj lingvoj.

La lernado de Esperanto plibonigas, kaj la akiron de pliaj lingvoj, kaj pli profundan enrigardon en la ĝeneralan funkcion de lingvo, ankaŭ de la propra gepatra lingvo.

2. Ni rekomendas al la Eŭropaj civitanoj, lerni Esperanton kiel unu el la du lingvoj, kies akiron rekomendas la Eŭropa Komisiono.

La propedeŭtika efiko de Esperanto



Disciplinplene atendas partoprenantoj antaŭ la kongresejo la foriron al ekskurso.

povas tiam ebligi al la civitanoj la realan akiron de du aŭ pliaj fremdaj lingvoj.

3. Ni rekomendas, peri bazajn sciojn pri Esperanto en la lernejoj.

4. Ni rekomendas la enkondukon de Esperanto-instruado kiel fakultativan oferton en lernejoj.

5. Ni rekomendas Esperanto-

instruadon en universitatoj, ekzemple kadre de la Ĝeneralaj Studoj.

6. Ni rekomendas, trakti interlingvikon kaj Esperanton kiel studobjektojn en universitatoj.

**Aprobata de la membrokunveno de Germana Esperanto-Asocio je la 12a de junio 2011**

## Helmut Klünder honora membro de GEA

La 12an de junio en Münster la membrokunveno de Germana Esperanto-Asocio (GEA) nomumis Helmut Klünder honora membro de GEA. La ĉeestantoj akceptis per tio proponon de la GEA-estraro. La honorito estas denaskulo, kiu jam dum jardekoj aktivis en la Germana movado. De 1970 ĝis 1974 li estis prezidanto de Germana Esperanto-Junularo. Post kiam en 1983 la juna generacio transprenis la gvidadon de GEA, li estis prezidanto ĝis 1989. Ankaŭ poste li restis aktiva. Jam en 1990 li tial prave ricevis la Zamenhof-medalon. Li kreis la Elisabeth-Klünder-fondaĵon, memorige al sia multe tro frue forpasinta edzino. El tiu monfonto li regule subvencias Esperanto-aranĝojn. En la Interreto li zorgas pri tio

ke Esperanto kaj GEA estu reprezentataj en portaloj kaj diskutforumoj. Ne laste li regule servas kiel estro de fama „knajpo“, ankaŭ nun en Münster li helpis tie. Inter la gratulantoj estis ankaŭ lia filo Nils, kompreneble denaskulo kiel jam tradicie en la 4-a generacio de la familio.

Aldona rimarkigo. De tempo al tempo la GEA-estraro ricevas proponon por nomumi tiun aŭ alian honora membro, eĉ estas sinmemproponoj. Por iĝi honora membro de GEA ne sufiĉas, ĝenerale esti aktiva Esperantisto dum jardekoj. La kandidato akiru siajn meritojn en altranga pozicio de GEA (aŭ en samranga nivelo) per eksterordinara agado, kiu donas al la Germana Esperanto-movado senteblan impeton. Tio povas ankaŭ esti la ekigo de

fondaĵo, kies fruktoj subtenas la taskojn de GEA. (voko)



Sceno el la kela "knajpo", dekstre Helmut Klünder, deĵoranta.